



CONVENIO DE COLABORACIÓN ENTRE A FUNDACIÓN PÚBLICA GALEGA PARA A TUTELA DE PERSOAS ADULTAS (FUNGA) E O GRUPO INDITEX PARA A REALIZACIÓN DUNHA DOAZÓN PARA A ADQUISICIÓN DE DIVERSO MATERIAL PARA O CENTRO DE ATENCIÓN A PERSOAS CON DISCAPACIDADE DE A CORUÑA

Santiago de Compostela, a 17 de febreiro de 2020

REUNIDOS

Dunha parte, dona Fabiola García Martínez, presidenta da Fundación Pública Galega para a Tutela das Persoas Adultas (en diante FUNGA) en virtude do seu nomeamento como conselleira de Política Social mediante o Decreto 89/2018, do 26 de setembro, do que se tomou coñecemento na reunión do padroado do 05.11.2018, data na que aceptou o seu cargo, actuando en nome e representación da FUNGA de acordo co establecido no artigo 19 dos seus estatutos.

Doutra parte, don D. Antonio Abril Abadín, con D.N.I. 10.579.174-W, en nome e representación de Industria de Diseño Textil, S.A. (INDITEX, S.A.), en diante "INDITEX", con NIF A-15 075 062, e domicilio social en Avenida de la Diputación, Edificio Inditex, 15142 Arteixo, A Coruña, de acordo coas facultades conferidas por acordo do Consello de Administración de data 17 de marzo de 2015, elevado a escritura pública outorgada ante o Notario de A Coruña, D. Francisco Manuel Ordóñez Armán, con data 10 de abril de 2015 e baixo o número 874 do seu protocolo

Ambas partes recoñécense mutuamente a capacidade para obrigarse e outorgar este convenio de colaboración, respectivamente.

EXPOÑEN

I. Que INDITEX é un dos principais distribuidores de moda do mundo, que reúne a máis dun centenar de sociedades vinculadas coas diferentes actividades que conforman o negocio de deseño, a fabricación e a distribución textil.



O modelo de sostibilidade de INDITEX artículase a través do Código de Conducta e Prácticas Responsables de INDITEX (en diante, o Código) que se define como un compromiso ético que inclúe principios e estándares básicos para o desenvolvemento adecuado das relacións entre INDITEX e os seus principais “Grupos de Interese”- empregados, clientes, accionistas, provedores, socios de negocio e sociedade en xeral- alí onde INDITEX desenvolva o seu modelo de negocio.

O Código, no apartado relativo a “sociedade” establece que: “INDITEX se compromete a colaborar coas comunidades locais, nacionais ou internacionais nas que desenvolve o seu negocio”.

INDITEX, no marco do seu modelo de Sostibilidade, considera necesario realizar doazóns monetarias en beneficio de aquelas comunidades nas que desenvolve a súa actividade.

II. A FUNGA é unha entidade constituída pola Xunta de Galicia, do sector público da Comunidade Autónoma de Galicia, sen ánimo de lucro, con personalidade xurídica propia que ten afectado de xeito duradeiro o seu patrimonio á realización dos fins de interese xeral que se recollen no artigo 6 dos seus estatutos.

Segundo este artigo 6, son fins da FUNGA a protección xurídica, patrimonial e social das persoas maiores de idade incapacitadas legalmente e en situación de desamparo; facilitar o acceso ás actividades de asistencia, prevención, rehabilitación, integración socio-laboral e formación, que favorezan a súa integración na comunidade; promover a realización, sexa directa ou indirectamente, de programas que faciliten o desenvolvemento social das persoas tuteladas; orientar e asesorar ás persoas que exerzan funcións tutelares, e en xeral a todas aquelas persoas que demanden información; participar na formación de profesionais relacionados cos servizos sociais de atención ás persoas con capacidade limitada; fomentar actividades de carácter educativo, técnico, científico e cultural no ámbito da protección xurídica e social das persoas maiores de idade incapacitadas xudicialmente; impulsar actividades de divulgación e sensibilización social para fomentar o respecto aos dereitos das persoas maiores de idade con capacidade legal limitada e a súa maior integración e normalización na sociedade; e fomentar accións de patrocinio, solidariedade e financiamento no ámbito da tutela de adultos por parte de empresas e entidades públicas e privadas.



Para a consecución destes fins a fundación poderá establecer convenios e, no seu caso, protocolos de colaboración con institucións públicas e privadas, que faciliten a súa consecución.

III.- Anualmente, INDITEX celebra un mercadillo solidario para os seus traballadores no cal, xunto co importe de venda dos produtos, estes poden engadir cantidades adicionais a modo de donativo voluntario.

A cantidade recadada por INDITEX no marco do referido mercadillo solidario, tanto polas vendas realizadas coma polas doazóns complementarias, é adicada á realización de fins e actuacións de tipo social e benéfico.

No caso do mercadillo do presente ano INDITEX decidiu adicar os seus resultados a realizar unha doazón á FUNGA co obxecto de que esta adquira determinado material ca finalidade de adicalo ao Centro de Atención a Persoas con Discapacidade de A Coruña, dol cal son usuarias varias persoas tuteladas pola FUNGA.

En atención ao exposto nos números anteriores, as partes acordan asinar o presente convenio de colaboración para a realización de doazóns, que se rexerá polas seguintes

CLÁUSULAS

PRIMEIRA.- Obxecto



Constitúe o obxecto deste convenio (i) a regulación da doazón que INDITEX realiza á FUNGA e que ascende a 373.150 euros recadados no mercadillo solidario de datas 10, 11, 12 e 13 de decembro de 2019 e (ii) a regulación da obriga de INDITEX de entregar á FUNGA a cantidade de 27.018 euros doados polos seus empregados á citada entidade. Ambas doazóns serán denominadas no sucesivo, a “Axuda Económica”.

SEGUNDA.- Obrigas das partes

1. INDITEX obrígase a entregar á FUNGA a Axuda Económica para a adquisición de diverso material para a atención dos usuarios do CAPD de A Coruña, o cal consta relacionado no Anexo do presente convenio.



2. Pola súa parte, a FUNGA comprométese a levar a cabo a adquisición do material e poñelo a disposición do CAPD de A Coruña.

Os fondos da Axuda Económica deberán destinarse ás partidas detalladas no anexo do presente convenio e non se poderán realizar variacións/reclasificacións de gasto entre as mesmas por unha porcentaxe superior ao 10% sen autorización previa e expresa do departamento de sostibilidade.

A FUNGA comprométese a facilitar a INDITEX, tras a recepción da cantidade doada, o certificado regulado nos artigos 24 da Lei 49/2002 do 23 de decembro, de réxime fiscal das entidades sen fins lucrativos e dos incentivos fiscais ao mecenazgo e 6 do Real Decreto 1270/2003, do 10 de outubro, polo que se aproba o regulamento para a aplicación do réxime fiscal das entidades sen fins lucrativos e dos incentivos fiscais ao mecenazgo, que conteña a seguinte información:

- a) O número de identificación fiscal e os datos de identificación persoal de INDITEX S.A. e a FUNGA.
- b) Mención expresa de que a FUNGA se atopa incluída entre as entidades reguladas no artigo 16 da Lei 49/2002, do 23 de decembro.
- c) Data e importe do donativo realizado por INDITEX no seu propio nome (é dicir, sen incluír as cantidades doadas polos seus empregados).
- d) Destino que a entidade donataria dará á cantidade doada en cumprimento da súa finalidade específica.
- e) Mención expresa do carácter irrevogable da doazón, sen prexuízo do establecido nas normas imperativas que regulan a revogación de doazóns.

TERCEIRA.- Abono da axuda e tratamento bancario dos fondos.

INDITEX realizará o ingreso da Axuda Económica na conta corrente de titularidade exclusiva da FUNGA número IBAN ES65 2080 0316 2730 4001 2703.

No seu caso, os intereses devengados pola Axuda Económica prestada por INDITEX, serán destinados á adquisición de material en concepto de custes indirectos, debendo xustificarse o gasto destes intereses de xeito análogo ao resto de partidas descritas no Anexo do presente convenio.

O desembolso da Axuda Económica se realizará nun único pagamento nos días posteriores á sinatura do presente convenio, de acordo coa política de pagamentos de INDITEX.

Se por calquera circunstancia, a actuación non se levara a cabo, ou a xustificación do gasto non fora axeitada a xuízo de INDITEX, a FUNGA se compromete á devolución proporcional dos fondos, non utilizados ou non xustificadas, recibidos de INDITEX.

A FUNGA poderá así mesmo verse obrigada a devolver o importe total da Axuda Económica si do resultado da auditoría que, no seu caso, se levase a cabo de acordo co previsto na cláusula cuarta, en relación coa comprobación do cumprimento do plan de execución da actuación e/ou valoración do impacto dos resultados obtidos, se verificase a existencia dalgún feito relevante do que, a xuízo razoable de INDITEX, se puidera derivar un impacto reputacional material e adverso para esta ou puidera ser considerado como un incumprimento substancial dos termos e obxectivos do convenio.

CUARTA.- Requisitos e documentación xustificativa do gasto

A achega da Axuda Económica efectuarase en euros.

A FUNGA levará unha contabilidade que garanta a trazabilidade e o seguimento dos gastos imputados á Axuda Económica prestada por INDITEX.

Os documentos xustificativos do gasto serán facturas. Estes documentos deberán estar debidamente numerados e ordenados conforme ás partidas do orzamento aprobado e desglosado no Anexo deste convenio.

A FUNGA remitirá a INDITEX un listado inclusivo de todos os documentos xustificativos. A documentación xustificativa orixinal quedará custodiada pola FUNGA durante polo menos 5 anos, sempre que sexa posible enviala fora do país de execución, cando este non sexa España. No caso de que non fora así, xustificárase tal





circunstancia no informe final que se realizará unha vez adquirido o material e certificarase o lugar de depósito da documentación orixinal.

O informe final incluírá unha liquidación económica que permita coñecer cal foi o fluxo de fondos e determinar cales foron as desviacións dos gastos con respecto á formulación aprobada e o excedente ou déficit final resultante.

INDITEX poderá levar a cabo, a súa discreción e cargo, unha auditoría do dito informe final, co fin prioritario de verificar o control orzamentario da actuación e verificar que a Axuda Económica foi destinada integramente ao mesmo (conforme ás especificacións incluídas, no seu caso, no anexo). En todo caso, INDITEX poderá determinar libremente a natureza, obxectivo e alcance da dita auditoría.

QUINTA.- Comunicación pública

INDITEX poderá comunicar publicamente a súa participación no presente convenio na súa Memoria Anual de Sostibilidade, así como en calquera outra documentación ou comunicación pública relativa ás súas políticas de Sostibilidade.

A FUNGA facilitará a INDITEX acceso a toda a información das actuacións realizadas no marco do convenio, incluído, pero non limitado, a informes, fotos, entrevistas coas persoas responsables, etc. INDITEX poderá facer uso da dita información en calquera documentación ou comunicación interna e/ou pública relativa ás súas políticas de Sostibilidade. A FUNGA deberá asegurarse de dispoñer de todos os dereitos (incluíndo os dereitos de propiedade intelectual, industrial, de imaxe ou calquera outro) sobre o citado material e información.

As partes asinantes virán obrigadas en materia de protección de datos a cumprir co Regulamento (UE) 2016/679 do Parlamento Europeo e do Consello, de 27 de abril de 2016, relativo á protección das persoas físicas no que respecta ao tratamento de datos persoais e á libre circulación de estes datos e polo que se derroga a Directiva 95/46/CE (Regulamento xeral de protección de datos); coa Lei orgánica 3/2018, do 5 de decembro, de protección de datos persoais e garantía dos dereitos dixitais; e demais disposicións vixentes sobre a materia.

As obrigas establecidas na presente cláusula terán unha duración indefinida.





SEXTA.- Establecemento dunha comisión mixta ou de seguimento

Para facilitar o seguimento da colaboración, constituirase unha comisión mixta composta por parte de INDITEX por Carlos Piñeiro Aneiros e por parte da FUNGA por Francisco José Brea Santiago.

Serán funcións desta comisión asegurar o bo fin e cumprimento do obxecto deste convenio, así coma interpretar as dúbidas que xere o seu cumprimento e resolver as controversias xurídicas consecuencia da súa execución.

Non obstante, de producírense a xuízo de calquera das partes desacordos reiterados no seo da comisión que dean lugar á imposibilidade de chegar a unha solución amistosa despois de, cando menos, dúas sesións, e que impidan a correcta execución e desenvolvemento do presente convenio, calquera das partes poderá instar a resolución deste.

SÉTIMA.- Vixencia

O presente convenio entrará en vigor o día da súa sinatura e estenderá a súa duración ata a materialización efectiva da Axuda económica.

En todo caso, o presente convenio terá unha duración máxima de catro anos a contar dende a data da súa sinatura, podendo ser obxecto de prórroga por outro prazo similar ou inferior.

OITAVA.- Publicidade das actuacións

Os actos relativos á información e comunicación das actuacións realizadas ao abeiro do presente convenio, así como os termos nos que se fará pública esta colaboración estableceranse de común acordo por ambas partes, sen prexuízo do cumprimento das correspondentes obrigas en materia de publicidade por parte da FUNGA.

FUNGA

A





NOVENA.- Causas de resolución.

Serán causas de resolución do presente Convenio, xunto co mutuo acordo das partes e o transcurso do prazo da súa vixencia sen acordarse a súa prórroga, o incumprimento das obrigas ás que as partes se comprometen na cláusula segunda do mesmo.

DÉCIMA.- Carácter do Convenio

Este convenio ten natureza privada, aplicándose con carácter supletorio para cubrir dúbidas e lagoas que poidan xurdir o disposto na Lei 39/2015 do 1 de outubro, do procedemento administrativo común das Administracións Públicas e na Lei 40/2015, do 1 de outubro, do réxime xurídico do Sector Público, así coma calquera outra normativa concordante e de desenvolvemento.

DÉCIMO PRIMEIRA.- Rexistro e publicidade

Para garantir a publicidade e transparencia o convenio inscribírase no Rexistro de Convenios regulado polo Decreto 126/2006, do 20 de xullo e pola Lei 1/2016, do 18 de xaneiro, de transparencia e bo goberno, que pretende ser un elemento de mellora dos mecanismos de transparencia e publicidade das actuacións da Administración autonómica galega.

Os representantes das partes asinantes do convenio, manifestan o seu consentimento para que os seus datos persoais poidan ser publicados no Portal da transparencia e goberno aberto.

E en proba de conformidade, ambas partes asinan o presente convenio de colaboración en triplicado exemplar e a un só efecto en Santiago de Compostela.

Pola FUNGA

A presidenta

Fabiola García Martínez

Por INDITEX

Secretario Xeral e do Consello

Antonio Abril Abadín





ANEXO
ORZAMENTO ESTIMADO DA ADQUISICIÓN DE MATERIAL PARA O CAPD DE A
CORUÑA

	Cantidades	Descrición	Prezo de mercado (unitarios)	Prezo total
Camas enfermería	20	Inclúe cama Evenda , colchón , mesita comida e noite , armario e cadeira de brazos	4.700,00€	94.000,00 €
Grúas de bipedestación	2	Grúa Sara Flex con arnés	5.600,00€	11.200,00 €
Grúas de bipedestación traslado	2	Sara Stedy con arnés	3.900,00€	7.800,00 €
Camilla de ducha	2	Carevo	8.000,00€	16.000,00 €
Cadeira de ducha	2	Carendo	7.800,00 €	15.600,00 €
Bañeira	4	Sistema Parker	12.000,00 €	48.000,00 €
Bañeira relax	2	Sistema Rapshody	15.000,00 €	30.000,00 €
Grúa para Bañeira	2	Grúa Miranti	9.000,00€	18.000,00 €
Cadeira relax	6	Cadeira Wellness nordic	12.000,00€	72.000,00 €
Cadeiras de brazo de descanso	20	Cadeira de brazos Pardo	300€	6.000,00 €
Cadeiras anfibias	6	Pardo	2.500€	18.000,00 €
Carro de psicomotricidade	3		1.000,00€	3.000,00 €
Xogo de arcos estimulación	6		200,00€	1.200,00 €
Pizarra dixital (Talleres + Centro de día)	8	Basic Pack	1.700,00€	13.600,00 €
Pantalla táctil reforzada	20	Hiundai	1.000,00	20.000,00 €





Tablet con funda protectora	20	Sistema SHX	750,00€	15.000,00 €
Gafas 3D	20	Oculus rift	200,00€	4.000,00 €
Programa de comunicación alternativa	20	Grid 3 (Irisbond Duo)	8.000,00€ (Dispositivo completo) 1.500-Software	30.000,00 €
Wii	20	Nintendo Sports Pack	350,00€	7.000,00 €
Impresora 3D	4	Con pantalla LCD e teclado para uso sen conexión	3.000,00€	10.000,00 €
Sistema de acceso a ordenador con control de mirada	1	Tobii PCEYE Acceso	3.000,00€	3.000,00 €
Cuñas rehabilitación	10		100,00€	1.000,00 €
Cuñas abductoras	60		100,00€	6.000,00 €
Colchonetas descanso	20		100,00€	2.000,00 €
Puff descanso	20	Tipo pera	250,00€	5.000,00 €
"Circuit training" adaptado	1	O equipamento escólese en función de la diversidade funcional	20.000,00€	20.000,00 €
Portátil	20		800,00€	16.000,00 €

Este orzamento estimado acadaría un total de **493.400,00€**, porén dado o carácter estimativo do orzamento vinculado a cada partida, e a variación que poden sufrir os importes debido aos procedementos de contratación, o alcance final da actuación non se pode definir con exactitude no momento actual, non obstante, asegúrase que o destino dos fondos doados será única e exclusivamente a adquisición de material para o CAPD de A Coruña, sendo a intención da FUNGA a adquisición da maior cantidade posible de material.

